



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 8



CM-i ano shidi magizük:
Meghalaya home minister

COVID-19 mechi Sri Lanka nung
economic emergency sangdong



VOL. XVIII NO. 320 (ADOK 320) DIMAPUR

YANGTEPNÜ (THURSDAY)

RONGJUI (SEPTEMBER) 02, 2021 ₹ 5.00

COVID-19 Nagaland: 76 taneptsü angur; 74 dak putet

Kohima, September 1, 2021 (TYO): Bodbarnü Nagaland nung COVID-19 puteter dang nungibo taneptsü angur teimba liasü. Tanü nisung 76 taneptsü angur aser 74 dak putet.

"Tesüiba ghonda 24 tsüingda nisung 74 dak COVID-19 putet. Parnokji Dimapur nung 47, Kohima nung 12, Mokochung nung 8, Phek nung 5 aser Longleng o Mon nung kaka (1) lir. Tanü puteterem züingsema nisung ajak agi 30,157 kümogo" ta Integrated Disease Surveillance Project atema State Nodal Officer, Dr Nyanthung Kikon-isa ashi.

"Maneni tesüiba ghonda 24 tsüingda COVID-19 puteta alir nisung 76 taneptsü angur. Parnokji Kohima nung 33, Dimapur nung 32, Phek nung 7, Mon nung 3 aser Tuensang nung 1 lir" ta paisa ashi.

India nungbo C.1.2 COVID variant puteta mali: Centre

New Delhi, September 1, 2021 (Agencies): C.1.2 ta ajaba COVID-19 variant tasen ka linük aika nung adokogo saka Centre sorkari Bodbarnü India nungbo iba strain puteta osang mali ta metetdaksüogo.

"Tang tashi nung India nung Covid variant C.1.2 puteta osang ka danga mali. Institute of Genomics and Integrative Biology-i iba variant puteta osang agitepdar" ta Union health ministry-i ashi.

C.1.2 coronavirus variant ya tezübaba menateptsü akok aser vaccine agia menokdangtetsü ta health mongintemi ashir.

C.1.2 ya mezüing South Africa nung putet aser iba sülen August

Taneptsü angur ajak agi 27,838 kümogo aser ibaji 92.31% lir. Tang nisung 805 anepaludar, ta Dr Kikon-isa ashi.

"Mongulbar tashi nung nisung 657,375 nem COVID-19 vaccine indang dose 860,445 agütsüogo" ta State Immunization Officer, Dr Ritu Thurr-ia metetdaksü.

"Vaccine agirtemji frontline workers 60,848, healthcare workers 15,991, arishi küm 45 ser temapur 192,906 aser arishi küm 18 nungi 44 tsüingda alir 387,630 lir" ta paisa ashi.

"Vaccine agirtem rongnung nisung 203,070-i dose anaprong agiogo. Parnokji frontline workers 44,209, healthcare workers 31,268, arishi küm 45 ser temapur 114,672 aser arishi küm 18 nungi 44 tsüingda alir 31,268 lir" ta Dr Thurr-isa metetdaksü.

13 tashi nung China, Democratic Republic of the Congo, Mauritius, UK, New Zealand, Portugal aser Switzerland nung puteta osangtem lir.

Taküm May ita South Africa nung National Institute for Communicable Diseases (NICD) aser KwaZulu-Natal Research Innovation and Sequencing Platform (KRISP) ajanga C.1.2 puteta osang metetdaksü liasü.

"C.1.2 virus strain kanga junga asadanga repringdar. Iba variant ya tanga dang nungi temelaba menatepa aotsü akok aser vaccine-ia menokdangtetsü" ta World Health Organisation (WHO)-ia metetdaksüogo.

GPRN tenüing amer tax meshirtem merenshitsu: MIP

Dimapur, September 1, 2021 (TYO): Nagalim kübok tesemaika nung GPRN tenüing amer state sorkar aser nija mapa inyakertem dang tax meshirtem ozüing tapet agi merenshitsu, ta National Socialist Council of Nagalim/ Government of the People's Republic of Nagalim (NSCN/ GPRN)-i metetdaksüogo.

"Nisung kari ozüing

memelaba tax meshiba osangtem angazükogo anungji Region CAOs, Caretaker CAOs, Sub-Region EOs, POs aser KTU President ajak dang temelaba melii mapa inyakba magizükur ta metetdaksü. Nisung kari danga iba mapa inyakba puteta sorkar Ahza nung lateta aliba ama merenshitsu" ta MIP, NSCN/ GPRN sangdong ka nung ashi.

September ita tashi nung school staff ajak nem vaccine agütsütsü

New Delhi, September 1, 2021 (Agencies): Bodbarnü Union Education Minister Dharmendra Pradhan-i ministry ketdangsurtem den linük nung school lapoktsü aser staff nem vaccine agütsütsü atema senden ka menogo.

"Education Minister Dharmendra Pradhan-i Department of School Education & Literacy ketdangsurtem den school tem tanaben lapoktsü indang osang metetpelaogo. Paisa September ita tatemlen tashi nung school tem nung teaching & non-teaching staff ajak nem vaccine agütsütsü atema sentong renema inyakba meyipa repringshio" ta Ministry of Education-i metetdaksü.

Yaküm March ita nungi novel coronavirus azüoktsü atema linük

ajanga lockdown asüandang school tem shibanga liasü.

Yaküm October ita Centre-i state tem nung COVID-19 tensa asadanger school tanaben lapoktsü temelaba agüja liasü. Iba sülen state aika nung school tem lapok saka ano COVID-19 wara tanabuba adokba agi taküm April nungi school tem shibangtsüsa aküm.

COVID-19 tensa tajungba akümba ajanga staff aser tesayur ajak vaccine magiaka, state aika nung school tem lapokogo.

"Centre sorkari timtem kecha melii linük nung school tem tanaben lapoktsü atema teaching aser non-teaching staff nem vaccine agütsütsü atema tongti süa inyaker" ta Ministry of Education-i tanü ashi.

US sepaitemi Afghanistan toktsür ogo; Taliban-i sorkar akümtsü

New Delhi, September 1, 2021 (Agencies): Küm 20 tashi Afghanistan nung liyonga aruba sülen August 31 nü United States-i par sepaitem anir aoba maparen tembangogo. Kasa mapang nung Taliban tongti lennirtem Kabul nung sorkar tasen ka akümtsü atema jembiteper.

Afghanistan nung sorkar tasen ka akümtsü atema Taliban lennirtem aser Haqqani Network tsüingda olemteper ta osang angazükur.

Taliban-i Iran nung sorkar kütmeta aliba ama Islamic republic ka akümtsü sentong lir aser iba nung sorkar tekolakbaji Supreme Leader lir.

Taliban supreme leader Hibatullah Akhundzada-i Afghanistan nung Supreme Leader mapa inyaksü akok aser pai züingsem 11 nungi 72 aliba Supreme Council madak ketdangtsütsü ta osang ajanga

ashi. Supreme Leader-i Kandahar nungi teimba mapa inyaksü akok.

"Taliban supreme commander Haibatullah Akhundzada lenisüba kübok Afghanistan sorkar akümtsü" ta Taliban cultural commission züingsem Bilal Karimi-i Bodbarnü metetdaksüogo.

Akhundzada den tongti süa yariteper nisung asem rongnungi Mullah Abdul Ghani Baradar-i sorkar ketdangsubaren repringtsü akok, ta Karimi-isa ashi.

"Islamic Emirate of Afghanistan lennirtem sasep nung ajak adenba Afghan sorkar akümtsü atema jembishinüdar. Taoba sorkar nungi lennirtem aser tongtipang tanishirtem sorkar tasenba nung adentsü" ta Karimi-isa ashi.

"Parnok molungtepogo aser anogo ishika tsüingda cabinet aser sorkar akümba osang sangoktsütsü" ta paisa ashi.

"US sepaitem ajak aoba sülen ang Taliban-i sorkar akümba osang sangoktsütsü atar. Akhundzada aser Baradar naprongi kobi melii Kabul nung yimjak nung o jembitsü" ta ketdangsur kati ashi.

US sepaitemi Afghanistan toktsür aoba atema Taliban züingsemtemi kanga pelar saka ano parnoki sorkar ka kümba ketdangtsü aotsü atema tayongzükba jenti lir.

Külen, kin balala indang telungpur teloktem aser ISIS nungi razüka aoba kiralongrar telok ka ajanga civil war adoktsüsa tia ka nung lir.

Taliban supreme commander Haibatullah Akhundzada ya tang Kandahar nung lir aser pai anogo asemnü tashi Taliban tongti lennirtem aser tanga Afghan lennirtem den senden ka menogo, ta Taliban main spokesman Zabihullah Mujahed-i ashi.

PM Modi-i economist ka ama sayur: Congress

Guwahati, September 1, 2021 (Agencies): Bhartiya Janata Party (BJP) sorkari India' rongsen yokdokba atema Bodbarnü All India Congress Committee (AICC) general secretary aser taoba Union Minister Mukul Wasnik-i Guwahati nung osangbener den senden ka amen.

"1946 nungi 2014 tashi linük tejakleni mao mesüra mapa kecha meinyak ta Prime Minister Narendra Modi-i teti ashir. Tesüiba küm 70 nung Congress-i mapa kecha meinyak ta paisa shiogo" ta Wasnik-i metetdaksü.

"PM Modi-i pa ya economist tashir ka ama sayur. May 2014 sülen ang linük tejakleni aoer ta

pai ashir" ta Wasnik-isa ashi.

Ajisüaka, Modi'er sorkar kübok repringdangra mapa manguba khuret ulura adoka lira ser iba ya taoba küm 45 tsüingda majurudangba liasü, ta paisa ashi.

Centre-i tawa Rs 6 lakh crore indang National Monetisation Pipeline (NMP) tenzüka osang metetdaksüogo. Iba ya power nungi roads aser railways tashi nung infrastructure rongsentem yokdoktsüba indang lir.

"NMP ajanga FY 2022 nungi FY 2025 tashi Rs 6 lakh crores aazüktsü ta Union Finance Minister Nirmala Sitharaman-i ashi saka Modi'er sorkari NMP scheme ya kanga dang miima

yangluba lir" ta Wasnik-isa ashi.

Taoba mapang Centre nung sorkartemi nübertem nungi anguba sen million aika endoka item rongsen ya yangluba liasü saka Modi'er sorkari itemrongsen ya parnok medemer ket nung agütsünür, ta paisa metetdaksü.

"India sorkar ya private sector enterprises indang kibur masü anungji parnoki (Centre) molungba ama meyokdoktsüla. Item rongsen ya India nunger meyong lir" ta Wasnik-isa shisem.

NMP nung tanga kecha mali saka Modi-i aniba sorkari linük rongsentem parnok medemer kar nem yokdoknür, ta paisa metetdaksü.

JANGJASHITSÜR

Anogo, 14th August 2021 Nagaland Post adok aser 15th August 2021 Tir Yimiyim adok osang kaket nung Ao Senso Telongjem Dimapur (ASTD)-i Naga Council Dimapur (NCD) dak sendakba ken O nung mapensai züluba kar yamai jangjashitsüner. Aser iba jangjashitsüba ya taoba 24th August 2021 anogo nung ASTD dang telangzüba meshia züluba nung kecha osang magutsüba ajanga tanü yangi nubortem-i angajemtsü asoshi yamai jangjashitsür:

1. Naga Council Dimapur (NCD) nung ASTD nungi Councillor asütsü küna shimteter yok. Saka NCD Office ajanga küna melena nübo temelen meshiba ajanga ASTD-i NCD tashi anga küna melena nübo tasen shimteta yok. (Ref. Letter No. ASTD/GEN/01/21/49-50 Dt. 10/07/21). Anungji künati court case agütsüba ajanga temelen yok ta ASTD ajanga osang kaket nung zülubaji kenyongi tai.
2. NCD ketdangpur shimba yim nung temzüng-i lateta aliba ama mesüi Councillor shirnok Term tempanger sodi agi, parnoki parnok molungka nung par-i saklokba nübo shimteta yutsü nung asen Naga kin ishika den külemi senteper Court nung iba tim masüba mapa anema ken O agütsü. Aser aji oda tongteprateptsü tim lenir denbo angatetteper iba court case agütsüba nung küna denna liasü. NCD ketdangpurtem shimba yimya NCD Constitution nung aliba ama mesüi inyakba tim masü ta nokdakba asoshi künati asen Aor tenüing menüktsüogo ta zülubaji kanga dang tim masü.
3. NCD Councillor tsüingda mangatetep aliba tangatetep kati bener arutsü ASTD President tiyongtsü-i aitta anogo 6th May 2021 nung tangatetep kati arudaktsüa meyongnem agitep, saka ASTD lenisüba nung koba MOU ka sign sütepa court case withdraw asü, iba sülen ASTD-i iba MOU akhüm metsübi pa teinyaksü shilem tim magi-i kümadok. Iba yongji asen Naga kin ishikati ASTD Tir dang iba tangatetba asüingdanga liasü. Saka iba onükji rajemtsütsü melena ASTD-i yokba Councillor ana anema tiyazü kuli agütsüba osang kaket nung onok tenüing menüktsüba ya kanga tai.

S. MAR AIER

WALTER LONGCHAR



Phek district kubok Chizami nung August 31, 2021 nü Eastern Mission High School ki indang nungshilong azungba sülen K.G.Kenye, MP, Rajya Sabha aser dangartem külemi tangokba noksa ka yangi angur.

NBSE ajanga Financial Literacy course atema metetdaksü

Dimapur, Rongjui/September 01 (TYO): Nagaland Board of School Education ajanga Class IX aser X nung Financial Literacy course agütsüba school sangdong ka nung ashiba agi:
1. Financial Literacy Examination 2021 ya school tem ajanga online mode nung 20th nungi 24th September, 2021 nung agütsü.
2. Board-i examination indang routine magütsüsü. Latetja aliba anogotem nung school ajanga pei kaketshir asoshi anogo aser mapang lateta tatidang ya agütsü. Nungdakra school ajanga batch lemsar agütsü akok.
3. Question paper nung 50

(Fifty) Multiple choice Questions (MCQ) alitsü aser question shia marks 2 (ana) alitsü.
4. School temi iba tatidang atema link ya tsünglanglen agüja aliba contact number nungi meshitsü
(a) Kohima, Mokochung, Tuensang, Mon, Phek aser Longleng districts nung aliba school tem 9436403929 nungi meshitsü.
(b) Wokha, Zunheboto, Dimapur, Kiphire aser Peren district tem nung aliba school temi 9436821905 nungi meshitsü.
5. School tem nem tatidang indang link ya tatidang agiba anogo nung ghonda ana

jelia agütsüsü.
6. Kaketshir indang Registration form aser course fee Board nem agütsür aliba school tem dang tatidang ya agitetsü.
7. Temelaba agüja maliba nisung kar nungi danga link ya school/kaketshir temi ngutetra Board kecha khuret malitsü.
8. Iba tatidang agütsü atema teinyakstitem ya anogo ishika tsungta NBSE Financial Literacy WhatsApp group nung agütsüsü. Anungji school kobasa tang tashi group nung mali, parnok indang WhatsApp number ya districts WhatsApp group nung agütsüsü.

Temjen Imna Along ajanga asükhu lemsatep

Dimapur, Rongjui/September 01 (TYO): Tanü nikonngang Dimapur nung Samuel Sumi asüba osang angashia ni temolung khuremer, ta BJP Nagaland tir, Temjen Imna Along ajanga September 1, 2021 nü sangdong ka ajanga ashi.
Samuel Sumi ya takotet aser shisa taka nüba ka liasü, shiba 2019 küm June ita kü indang PRO ka ama arua liasü.
Kümtem süyitema aodang yimtenren tsütsü tajangshiba balala nungi angazüka pai ni aser ozü telok asoshi akok tashi tajungtiba inyak, ta Temjen Imna Along ajanga ashi.

Pai Party asoshi bendanga agütsür meranga inyakba ngua pa ya 2020 küm BJP Nagaland indang state office nung Spokesperson mendeni ajungket aser ano talila Mon District indang mapa nungloksü, koba pa nem nungloksüba mapa pa tasünü tashi züngzünga inyaka liasü, ta ashi.
Pa asüba ya ni atema kisung masü saka BJP kibong ajunga asoshi takoksa tulu lir.
Samuel Sumi ya tamanger ka liasü, temeim aketba tebu, tashi angaba kinungbu, shibai kibong asoshi teti bilem aser külem tembartemi teti akumtsüba liasü.

Pa den maparen balala nung külemi inyakshiba ya takum tepiyong asoshi tajangshiba tajung ka alitsü. Pa asüba ajanga atangji nung dangar asoshi aria bilemba molungsentü adenba tanüla ka samaogo, ta BJP Nagaland tiri ashi.
Pa ya senti berem ka ama liasü, shiba shisa taka aser teti pela aliba nüba ka liasü. Pa maliba ya jangja-jangja metettsü.
Mangyimer kibong den ni aser Bharatiya Janata Party Nagaland ajanga asükhu lemsateper aser asür tanüla tesunep nung anisüngzükjang ta sarasademtsür, ta Temjen Imna Along ajangasa ashi.

HSLC & HSSLC toppers-i takok anguba osang lemsateptsü

Dimapur, September 1, 2021 (TYO): 1975 nungi 2021 tashi nung HSLC aser HSSLC tatidang nung Rank 1(one) takok angurtemi parnok takok anguba indang osang

lemsateptsü atema Nagaland Board of School Education (NBSE)-i Bodbarnü metetdaksüo.
NBSE indang portal nbsenl.edu.in. (Toppers Bio-

data) nung temaba jenjang takok angurtemi osang lemsateptsü akok. Iba ya kaketshirtem ajungmesotsü tangatetba nung NBSE-i tenezükba mapa ka lir.



Tawa tanü arula Mokochung Superintendent of Police, Kr. Aotula T Imchen IPS (mena allila) o Mokochung Press Club züngsemtem la indang office nung mensem ka akadang tangokba noksa nung angur. Tanü social media nung osangtsüsang tiyazü aika perokshir, anungji, iba jagi nüburtem mangmangdaksür. Iba ama tensa ka nung, osang kaket (news paper) aser osang zülurtemi kechi osang agütsür ta asüba nung nüburtemi temulung alemer, anungji, akok tashi nübur nem osangtsüsang shitak aser tejangja agütsüsübaji kanga tongtibang aser osangtemji tajungren nungi perokshitsü asoshi lai osang zülurtem ajungshia liasü. Mokochung, 1st September, 2021

Naga Council Dimapur-i asür L. Chingko Phom mang ayimer

Dimapur, Rongjui/September 01 (TYO): Taoba mapang Naga Council Dimapur nung vice president inyaka alisang, L. Chingko Phom asüba atema Naga Council Dimapur-i mangyim-jashi lemsateper, ta NCD tongti zülur, Thsapongkyu Sangtam-i sangdong ka ajanga ashi.
L. Chingko Phom ya September 1, 2021 nü Signal Phom Colony, Dimapur nung par kidang asü.

Pa ya Naga Council indang maparen aser inyaksangshi balala nung shilem agiba lenir ka liasü, shibai Dimapur aser Naga nung ajungtsü aser putepa alitsü atema shilem tulu agia liasü, ta NCD ajanga ashi.
Mangyimer kibong den Naga Council ajanga asükhu lemsateper aser asür tanüla tesunep nung anisüngzükjang ta sarasademtsür, ta sangdong ajangasa ashi.

DC Dimapur-i DPDB senden ayonger

Dimapur, Rongjui/September 01 (TYO): Dimapur district indang District Planning & Development Board ita shia amenba senden ya September 2021 atema Deputy Conference Hall, Dimapur nung September 2, 2021 anepdang

11:00 ako nungi amentsü, ta Deputy Commissioner Dimapur, Rajesh Soundararajan ajanga sangdong ka nung metetdaksü. Iba senden nung Dimapur District Planning & Development Board züngsem ajak arua adentsü mepishir, ta sangdong ajangasa ashi.

Dimapur Police-i ozüing alema inyaksangshirtem apu



Dimapur, Rongjui/September 01 (TYO): National Highway Chumukedima nung non-local mapa inyaker nem work permit agütsüba aser senotsü saruba dak sendakba nung Dimapur Police ajanga August 30, 2021 nü arishi küm 27 tain Kuputo SS. Under Secretary/ NSCN-K (NIKKI) aser arishi küm 27 tain Athrichum Sangtam SS Dy. Secretary NSCN-K (NIKKI) pua liasü.
Iba dak sendakba nung ken o ka Chumukedima Police Station nung benoka lir, ta Dimapur Police sangdong ka ajanga ashi.
August 30, 2021 nü Kevijau Colony, Dimapur nung truck driver tem dang nungi ozüing alema sen saruya lia arishi küm 37 tain Khevisha Kiba aser arishi küm 37 tain Azheto Kinny pua liasü.
Iba dak sendakba nung ken o ka Dimapur SBN PS nung benoka lir.
Signal Bazaar area, Dimapur nung non-local labourer nem work permits agütsüba aser ozüing alema sen saruba mechi Dimapur Police-i August 30, 2021 nü NSCN-K (NIKKI) den yariteper arishi küm 23 tain Vitoka Aye aser arishi küm 17 tain Ambo Yeptho pua liasü.
Iba dak sendakba nung ken o ka SBN PS nung benokogo, ta sangdong ajanga ashi.
August 31, 2021 nü Taxi stand, Dimapur anasa arishi küm 45 tain Hiniru Poumai, arishi küm 25 tan Moon Saikia,

arishi küm 49 tain Zenitsu Rengma aser arishi küm 46 tain Saidul Islam Haiti pua liasü.
Iba mapang parnok ket nungi Tramadol Hydrochloride Acetaminophen aser Dicyclomine Hydrochloride capsules tejang 4320 aser Herion südi ta temolung melemba soap box 25 nung gram 300 nguteta liasü.
Iba dak sendakba nung ken o ka Dimapur East PS nung benoka bushisüngdang tenezükogo.
August 31, 2021 nü Railway Station, Dimapur nungi arishi küm 40 tain Rajesh Thapa pua liasü. Iba mapang pa ket nungi brown sugar südi ta temolung melemba oset gram 55 shi plastic soap case pezü nung inoka aliba ngutet. Iba dak sendakba nung ken o ka Dimapur GRPS nung benoka bushisüngdang tenezükogo, ta sangdong ajanga ashi.
Maneni East Police Station, Dimapur nung FIR ka benokba nung ajemdaker August 29, 2021 nü auyar aliba Mahindra Bolero Pick-Up (Reg No. AS01MC6266) ka Khuzama nung GPS tracking ajanga ngutet.
Kohima nung aliba police nem osang agütsüba sülen Khuzama Police ajanga auyar aliba gari ya ngutet aser arishi küm 40 tain Kashing Peter pua liasü.
Iba dak sendakba nung ken o ka Dimapur East Police Station nung benoka bushisüngdang tenezükogo, ta sangdong ajangasa ashi.

Karbi Anglong nung Rs 4 crore alang heroin apu



Guwahati, September 1, 2021 (Agencies): Assam police-i Karbi Anglong district nung Rs 4 crore alang heroin apu.

Bokajan sub-division nung SDPO John Das-i anir police telok kati heroin gram 650 apu. Heroin ji sapon pongdang 50

nung miimba enoker bena liasü. "Assam police-i Lohorijan nung sen crore 4 shi alang heroin apu. SDPO Bokajan John Das-i aniba teloki heroin apu. Assam police nem tenüngsang agütsür" ta Dr Numal Momin MD-ia metetdaksü.

Tawa Assam police-i özüng alema mozü shibelenertem anema mapa tulu inyaka arur aser iba mapang mozü aika puogo.

Assam nung apuba mozütem ya teimba ka Manipur mesüra Mizoram nungi bener aruba liasü.

NRC mapa nung Rs. 360 crores tim mesüi amshi: APW

Guwahati, September 1, 2021 (Agencies): NGO Assam Public Works (APW) ajanga ken o benokba sülen Assam nung National Register of Citizen (NRC) mapa inyaka liasü aser tang parnoki NRC mapa inyakang senotsü tim mesüi amshioigo ta ken o benokogo.

September 1, 2019 nü NRC indang mezüngbuba list metetdakja liasü saka iba nung tim mesüi inyakba putetogo.

"Taoba küm ana tashi NRC mapa kanga dang meilungi inyaker. Supreme Court-i January 2020 nung tatemsabuba angadanga sülen ita 19 tashi tetuyuba kecha melii NRC mapa inyaka arur" ta APW President Abhijeet Sharma-i ashi.

"Onoki affidavits aika agüjaka iba ken o benoka mangadanger" ta Sharma-isa ashi.

Taoba NRC coordinator Prateek Hajela-i sayaba NRC list nung metokmeperi aika liasü ta tang teinyakdak NRC coordinator Hitesh Dev

Sharma-i Supreme Court dang shiogo.

Bangladeshi sensotem "original inhabitants" ta list nung enoka aliba indang Hitesh Dev Sharma-i shiogo, ta APW President-i ashi.

"NRC brokers kari Bangladeshi nung lakh 80 jungnüa nem India senso agütsü. Item nisungtemi NRC re-verification asütsü memolunger. Ozüng alema arurtem pusemertem aser Assam nung lia Taliban pusemertem ashiba ama masü saka 100% re-verification asütsü onoki akhanger" ta Abhijeet Sharma-isa metetdaksü.

"Dhubri, Kokrajhar, Chirang, Bongaigaon, South Salmara, Goalpara, Nalbari, Barpeta, Kamrup Rural, Kamrup Metro, Udalguri, Darrang, Sonitpur, Lakhimpur, Nagaon, Morigaon, Hojai, Cachar, Karimganj aser Hailakandi district tem nung 10% mesüra 20% re-verification masü saka 100% asütsüla" ta Sharma-sa shisem.

NRC mapa nung tamakok aludaktsübaji taoba NRC coordinator Prateek Hajela ajanga liasü ta Sharma-isa tai tongloktsü.

Hajela-i Assamese nung lenir ka den tesentaktep yur NRC senotsü tim mesüi amshi, ta Abhijeet Sharma-isa tai tongloktsü.

"Tesüsabuba Auditor General's Report nung Rs. 360 crores tim mesüi amshiba shia lir" ta pai ashi.

Assam Police Anti-corruption Branch-i Hajela anema ken o ka benokogo saka ita 6 süiaka iba ken o Home Ministry nem magütsü lir, ta Sharma-isa metetdaksü.

"Gauhati High Court nung Hajela-i senotsü tim mesüi amshiba indang ken o benoka lir. Data Entry Operator recruitment & salary nung Rs. 155. 83 crores aser generator aliba nung Rs. 21.06 crores tim mesüi amshiba den CAG report nung shia aliba onüktem atema ken o benok" ta APW President Abhijeet Sharma-isa ashi.

CM-i ano shidi magizük: Meghalaya home minister

Shillong, September 1, 2021 (Agencies): Meghalaya home minister Lakhmen Rymbui-i mapa nungi anenba shidi agütsü saka tang tashi chief minister Conrad Sangma-i iba shidiji magizük lir.

"Chief minister-i ni agütsüba shidi magizük tashi ni home department repranga atatsü" ta Lakhmen Rymbui-i ashi.

HNLC tanishir Cheristerfield Thangkhiew asüba sülen August 13 nü Shillong aser temeket nung mepetmesü adokba sülen Lakhmen Rymbui-i home minister menden nungi anenba shidi agüja liasü.

Lakhmen Rymbui-i Home department dang masü saka Meghalaya education department indang portfolio lemzüka repranger.

"UDP sorkar kübok home department-i özüngi memelaba tax sarur ta Congress-i tai tongloktsüba magizüker" ta Rymbui-i ashi.

Tawa Meghalaya Congress president inyaksü shimba Vincent Pala-i tejashi nung kuli maliba olen jembir, ta paisa metetdaksü.

"UDP ajangzüktsü atema department madak tim masüba mapa meinyaker" ta Lakhmen Rymbui-isa ashi.

Assam CM Sarma-i IIT Guwahati nem tenüngsang agütsür

Guwahati, September 1, 2021 (Agencies): Covid19 wara mapang Indian Institute of Technology (IIT) Guwahati-i mapa tajung inyakba atema Assam chief minister Himanta Biswa Sarma-i tenüngsang agütsü.

IIT Guwahati indang foundation day benjung amongdang chief minister Sarma-i tongti tesemdang ka ama shilem agi aser idangji IIT, Guwahati-i state sorkar ketdangsurtem den yaritepa COVID-19 wara anema inyakba atema pelaba ashi.

"IIT, Guwahati Director Prof. TG Sitharam lenisüba kübok wara azüoktsü atema mapa tajung inyakba atema tenüngsang agütsür" ta pai ashi.

IIT Guwahati ya IIT indang teju trokbuba lir aser 1994 küm lapok.

Bodbarnü IIT Guwahati indang 28 buba foundation day

among. "IIT Guwahati nung disinfectant drones, low-cost UVC LED-based disinfection system, Data-Driven State-wise assessment of the Covid19 amala yangluba osangtem angazükogo" ta CM Sarma-i metetdaksü.

"Assam nung National Health Mission (NHM) ketdangsurtemi COVID-19 tendangtsü atema inyakba mapa nung Institute-i instruments tajung agütsüba ni meteta lir" ta paisa ashi.

"IIT-i industry ka den yaritepa Assam nung Covid19 dak sendakba kits yangluogo" ta Sarma-isa ashi.

Mapang tatsüka tsüngda IIT Guwahati ya reju tajungtiba rongnung linük nung tanabuba menden nung aser alima jenjang nung 41 buba menden nung lir.

2021 nung IIT Guwahati-i Petroleum Engineering nung World Ranking angu.

TTAADC züngsemtemi Israel ketdangsurtem den ajuruteper



Agartala, September 1, 2021 (Agencies): Tripura Tribal Areas Autonomous District Council (TTAADC) züngsemtemi Brazilian Ambassador Andre Aranha Correa den ajuruteper anogo ka dang lir New Delhi nung Israeli Embassy in India ketdangsurtem den ajurutepergo.

The Indigenous People's Regional Alliance (TIPRA)

chairman Pradyot Debbarma lenisüba kübok TTAADC züngsemtemi Israel ketdangsurtem den ajuruteper.

Iba senden nung parnoki water management, agriculture, security aser cultural exchange onüktem jembi ta Pradyot Debbarma-i ashi.

Mongulbarnü TTAADC teshimtet lokisa Brazilian Ambassador Andre Aranha Correa den ajuruteper liasü.

Tripura cabinet nung nisung talila shimok

Agartala, September 1, 2021 (Agencies): Tripura cabinet ulushiba sülen anogo ka lir chief minister Biplab Deb-i nisung kar aniocka metetdaksügo.

Mongulbarnü minister asem-Ram Prasad Paul, Sushanta Chowdhury aser Bhagaban Chandra Das nung state cabinet nung aniocksema liasü.

Ram Prasad Paul nem Home (Jail and emergency services) aser Welfare of Other Backward Classes indang portfolio lemzüksü.

Külen, Sushanta Chowdhury

nem Information and Cultural Affairs, Youth Affairs and Sports lemzüksü.

Bhagaban Chandra Das nem Scheduled Caste, Labour and Animal Resource Development lemzüksü. Maneni, Tribal Welfare department Minister Mevar Kumar Jamatia nem fisheries department repsema inyaksü agütsügo.

Biplab Deb cabinet nung tetsür minister Santana Chakma dang lir aser la nem Urban Development department lemzüksügo.

GOVERNMENT OF NAGALAND STATE COUNCIL OF EDUCATIONAL RESEARCH & TRAINING NAGALAND: KOHIMA

NO.SCERT/SBTE/PSTE/ADVT/1/2010-11//

Dated Kohima the August 2021.

ADVERTISEMENT

Admission for Pre-service candidate to the 2-Year Diploma in Elementary Education (D.El.Ed)

Application are invited from intending candidates for undergoing the 2-Year Diploma in Elementary Education (D.El.Ed) under the SCERT Nagaland, Kohima for the academic session 2021-2023.

Requirement:-

- Candidates should have qualified 12th grade from a cognized Board/Council/University by obtaining atleast 50 % mark in aggregate ,5 % relaxable for SC/ST
- The minimum age limit is 18 years and maximum age is 28 years, relaxable upto 5 years for SC/ST only.
- The selection procedure will be based strictly on Merit and subject to availability of seats in each Institute.
- Candidate can apply for any one of the following Institutes.
 - DIET-Chiechama
 - DIET-Mokokchung
 - DIET-Mon
 - DIET-Tuensang
 - DIET-Pfutsero
 - DIET-Dimapur
 - DIET-Wokha
 - DIET-Zunheboto
 - St.Paul Institute of Teacher Education-Phesama
 - Salt Christian College of Teacher Education-Dimapur
- Admission forms can be downloaded from SCERT website (scert.nagaland.gov.in)
- The form, along with necessary documents should be submitted in the respective Institutes on or before 20th September 2021.

(N.CHUMCHANBENI KIKON)
Addl. Director (HoD)
SCERT:Nagaland,Kohima.



TIR YIMYIM YIMOBILEM (EDITORIAL)

DIMAPUR YANGTEPNÜ, RONGJUI (SEPTEMBER) 02, 2021

Nagaland nung adokba ayoker

Tizit nung anogo shia süngo seret meyrirjang tertrok (16,000 kgs) menüngtsüsa Langto Tea Industry ka yakanü nungi tenzüka lapokbaji iba industry kibur asoshi dang masü saka Nagaland asoshi takok tuluka asütsü. Tizit nungisa ano süngo ka tenüng agi Angh Khülap adoker. Item dakji alaka, ano Mokochung district nunga Tuli nungi Anüdok süngo aser Merangkong tea adokba den ano Japukong, Tzurangkong, Mopungchukit aser Longsa lushi nungi adokba süngo tapu balala asenoki ajemer. Iba Nagaland otsü nung nübortemi inyaktetba takok mapa ka asütsü. Asenok asoshia tangar ama, pei lima nung rongsen molutettsübaji temenu maka, anungji joko asenoka tangar nungi dang nüngdak ajak alitsüba masü saka meilongi asenokia tangar dang yoktetsüsa inyak tenzüker. Ibaji ajak asoshi tayongzükba tuluka asütsü. Asenok aikati o agibo alu tapu ajak yimtetta jembir saka o lu ayimer dang ashi, shitakba nungbo asenoki kecha lua meymitet o dang jembia akümüli süitemdaksür. Joko, iba amaji mapa mali o dang jembia mekazüi asenoka asenoki akok mapa inyak tenzüksüla. Tajung kaji, süngo dang masü asenok nisung karibo tangaleni coffee dena yok tenzüko. Item denji ano kari lon (pickle) tapu balala yanglua tanga bendanglenia yoker. Iba amaji ano karibo nüoshi, etsük, rübo, mongmong tu takong aser chuba mersü (Naga mircha) kanga junga züsenteta chiyongtsü kuma teronem menema yanglur ayoker. Item ama mapatemjibo sen endoka kiojen yanglutsüa menüngdaker, saka pei kidang, pei atepzüng nung renemtsüba mapatem lir. Atangji, süngo aser coffe lu ayimtsübajibo sen aser nübo nüngdaker. Ano, aikari rubber, kozü aser akhar lu ayimer. Item ajakji asenoki dang junga yimtetra tangari raktepa agitsü. Tamalen state tenzükl dangbo industry aser factory ajak ya government-i dang lapok. Ibaji asenok yimten inyakyim ya "Socialist economy" asüba agi lir. Socialist economy inyakyim nungbo rongsen züindaksüba aser nübortem nüngdak yangluba mapa ajak government ket nung dang alitsü, anungji rongsen poktetdaksüba mapa ajak nung kiburji government asütsü. Iba inyakyim nükjidongji nübortem rongnung, kasa nisungsa ser nung kar takarba- takarba akümütsü aser karbo tesensakba-tesensakba akümütsü ta mesüi pei lima nung akaba, adokba aser yanglutetba rongsen ajakji kasasa lemsaa agitsü tangatetba nung inyakba lir. Ajsüüaka, ibaji mapa kuma meinyakteter, kechiyong nisunger yimya nung pei meyong mesüra lokti meyong mesüra government meyong rongsenji shinga rongsen masü amai bilemer, anungji teinyakertermeranga meinyaker aser inti kasasa ajangzüksü asoshi inyaker ser nung inti meyong mapaji shinga meyong masü akümer. Iba jagi, Nagaland state tenzükl government-i Tizit len plywood factory lapok, Tuli nung paper mill lapok aser Dimapur nung Sugar mill lapok, saka item ajakji shibangogo. Iba jagi asenok dak dang masü saka alima aika nung Socialism inyakyim mapeter ta sayur. Atangji, kum 60 jakdangbo Nagaland nung industry lapoktsübajibo yutsür electric light mali, tzüma lenden len tsükloka angubaji amang nung temenungratsüka aser pangkaseta repringba mapang liasü. Idangjibo, industry lapoktsübajibo yutsür tsük asentsü kol-a malitet, semki nung teka ajak apuzüka asenba mapang liasü, anungji nübortem yaritsü atema government-i industry lapokyonga aobaji tim dang liasü. Asenokiang junga ketdang mesütetba agi dang ashi, item industry-temjia teinyaker ajak kibur küküma temulung agüja inyak nungbo tang yabo tuluba tuluba kuma takok ngua inyaker lila ta bilemer. Aji oda, tetenzükdangyongi government-i dang ajak inyakja tenzüka agi, asenoki tang tashi mapa ajak government-i dang inyaktsütsü amai bilemer. Ajsüüaka, taoba alima aso 20 buba nung inyakba inyakyim o tanü alima aso 21 buba nung inyakba inyakyim na kenyongi balala kumogo. Joko, government-ibo ozüng aser sentong dang yanglutsütsü aser teinyakerbo asenok (private) asütsü. Aji oda, akhidang amato masü, tanübo asenok rongnunga industry lapoktetsüsa takar aser tashitemetetter aika lir, anungji item jagi anir tang süngo lu yima süngo menüng tenzüka amaji, asen lima nung adokba aser züsentetba agi chiyongtsü aser tagitarutsü tapu balala yanglutetba tangar dang ayoktsüsa industry tilala asüyonga lapokyonga aotsüla. Atangji, asen lima nung item mapa meinyaktetba kuli kaji alima tensa majungba agi asütsüa akok, ajsüüaka, osang tajung kaji, tangbo ajak angateta arudagi. Tanabuba kuli kaji, asenoki election-i aiba ya sen ka agi ana meleni aier amai bilemer, ibayongji takartemi industry lapoka pei lima takar kumdaksütsü melen election-iang aier. Joko, tang nungibo item tangatetba ajak melenshir, asenoki asen lima nungi adokba tangar dang yoktetsüsa inyaktsü bilema inyakdi.

OLEMSABANG

ABAM 150 Jubilee Mung Sülen Kechi Inyaktsü?

~ Matsüng Longkumer (Osang Zülur)

(Yashi adok nungi...)

c. Arogo aser Lanurtem tebilemstü

Arogo züinba putu ka nung asenok alir. Arogotem aika lanur dak rangloker parnokki aginüba yimya nung külemba ajanga traditional arogotem nungi lanur jendi loa odakagi. Tarutsü Arogoji lanur Arogo süra iba ya tebilemstü tulu lir. Iba indang jembidang Tiatoshi Longkumeri lanur ministry ya 'ABAM temulungjang ministry asütsüla' aser parnok asoshi sendong asameyangtsüla ta shia liasü. Arogoi mapang talanga lanurtem tenyaba mapa nung senzüka yutsüba kuli aika jembia. Arogo nungeri Youth Pastortem 'time pass' pastor amai bilemba mesüra youth ministry ya appendix ka amai yutsüba a.a. Iba tebilemstü alidang Youth pastor karbo tanela tejangraba/tangatetba masü shi tejangraba agi kokdaksür lanur sentep nung südoksünem tali saka Tsüngrem O peria magütsüba lir. Member care ministry nung temulung agütsütsü nungdaker. Item ya reparanga lanur ministry ya khen restructure sür bener aotsü 150+ nungji tongti nükmén asütsü nungdaker ta ajaki lemsatep.

Tanela agi mesüba den külemi Youth Ministry ya lanurtem sempet rangben amshitetsüsa asameyang yanglutsü nungdaker. Item lanur rangben molutsü asoshi Impur nung mesüra tesem tajung ka nung skill/entrepreneur development centre lapoka Khristan sobaliba (spiritual, moral and ethical) nung amendaker training agütsütsü nungdaker. Iba yagi asen lima Khrista miemer jendi adoktsü aser lokti mapa nung sübokrem, ochimashinokdangtetsü.

ABAM 150+ aser Tanela Anepaluba mapa

ABAM 150 sülenbo Lai aser arogo tesayuba nung tali temulung agütsütsü sendong yanglutsüla. Aor tamanger noklang nung 90bo baptist arogo saka ya kechiar memetet aser Lai tesayuba kimong memetetba/makar aika lir. Kum nung khen Revival jangraba aser khuret alidang Tsüngrem bushiba kisung yagi dangbo ABAM arogotem tanela tashi maitsü. Literature aser Education Ministry ya khen restructure sür rongsen teperi enoka tanela ainba nung yaritsü literature peria adoktsüla. Tat.agi, catechism class ya Baptist Arogo aika (talisa Naga lima arogotem) nung magir aser iba ya ajanga Naga nunger Baptist tamanger aika foundation mali. Yangi tebilemstü tulu kaji lanurtem asen lima toktsür bendang lima university balala nung azüngdang tesayuba balala denchir aser foundation tajung mali nung item tesayuba balala ajanga asen lanur tajung aika anisaer.

ABAM 150+ aser Shisaliok Tenyaba mapa(Education)

Tamanger ka liromedema indaktsütsüji Arogo ka mapa. Liromedema ta kodanga südir yangi tanela, shi, shisatsü, molungsentsü, emotional, tekolok shisatsü ajak lir. Shisaliok tenyaba mapa ta kodang südir telemsa asem nung ABAM-i inyaktsü lemanga lir.

a. Christian Education Ministry


Christian Education Ministry (CEM) ya Arogo asoshi kanga tongtipang nükmén ta angateta tang tashi nung kanga junga bener arudar. Iba ya mapadong rongnung kangsa tongtipang ta angateta joko 150+ nungbo CEM ya jurila dedicated ministry ka yanglu nung kanga ajangzüksü. Iba dak sendak nung asen aser Aor sobaliba aser Ao Arogo densa den apet curriculum yanglutsü kanga tetemsü mapang lirta angateter. Asen kidanger Mungdang kar nungbo joko Postcolonial theology dena Sunday School nung tesayuba agütsür. Joko alima kanga kara ainer, aser aseni aginü-maginü ta mali university balala nung lanurtem azüngdang tesayuba balala ajurura parnok tamangba anokshitsür. Iba ama nungi kumzüka ayutsü asoshi Sunday School nung foundation tajung densa den apet yangertsü nungdaker. Apijemtsü Shin 22:6 nung ashiba ama "Tanur ka pei aotsüba lemang nungji sayutetang; aserparnok tain akümdang iba nungi mepilatsü."

b. Theological Institution

Arogo anepalutsü asoshi Tsüngrem O angazükdak mongjen ya kanga tongtipang lir. ABAM kübok Tsüngrem O angazükdak mongjen ana tashi, Impur Bible School (IBS) aser Clark Theological College (CTC), yateta kum jendi lenir aika moluteta arudar. Iba mongjen ana ya ken junga anepalutsü mapang ta aikati lemsa liasü. IBS ya upgrade asütsü nungdaker. Vernacular language aser English medium ana prongla course agütsütsü kanga ajungtsü ta bilemer. CTC ya ano junga khen repringshitsü nungdaker. Faculty kanga junga develop süa odagi, saka library development nung khen temulung agütsütsü lir. Iba den külemi IBS aser CTC ya loktep nung (amalgamate) ajungtsü südi ta kari shisem. Tena ya loktep nungbo IBS nung azüngertem exposure anguba den IBS jia ano jenjang ka ajungketer asütsü. Tena ya kodang loktepdir IBS campus, Impur lima, ya Ao Arogotem asoshi Resource Mobilization centre akümütsü ana nung dang lir. IBS aser CTC senteper Pastoral RefresherCourse mesüra Youth resource/training centre lapoka Arogotem yaritsü lemang bushitsüla. CTC nung Senate of Serampore dang masü tanga Accreditation dena agütsüba campus asü nung koda? D.Th aser D.Min ama course anemloktsü kanga ajungtsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir



Missionary John Bradley aser Jan Bradley nati Afghan nunger refugees tanurtem den tangokba noksa nung angur. Küm 13 tsüngda tenati Afghanistan nung school aser hospital aika lapoktsüogo. Tenati parnok den külemi yaritepa arur Afghan nunger 50 iba linük nungjagi kümzüksü meranger.

Bajrang Dal aser VHP lenirtemi Khristantem anema senden amen

September 01, 2021: August 27, 2021 nü Bajrang Dal aser Vishva Hindu Parishad (VHP) lenirtem Madhya Pradesh nung Jhabua district kübok Kalyanpura yimdak adenshia Khristantem anema senden ka menogo, ta International Christian Concern (ICC)-i metetdaksü.

Osang angazükba agi, senden nungji Hindu nunger lenirtemi, Khristan missionary temi Adivasi nunger sobaliba samatsütsü nükjidong nung sensaker tribal Adivasi nunger mesüzüka Khristan yimsü dangi meyipdaksür, ta tai tongloksü.

Senden tembangba sülen Bajrang Dal aser VHP lenirtemi district administration dang iba tesem nungji Arogotem aser missionary mapatem mita aotsüla mesüra parnok parnok sasa telemetba agia inyaksü, ta metetdaksü.

Iba senden nungji VHP lenir, Ajad Prem Singh densema right-wing nationalist telok balala nungi lenirtem aika aden.

ICC den jembidang Jhabua nung alir Khristan kati, "Taküm küm tetenzüklen state nung

anti-conversion ozüng agizükba sülen Hindu yimsü alia amanger telok balala temai adokogo," ta metetdaksü.

"Khristantem tsübuteper aser tetsübu agi Tenla ki aika shibangogo aser police-i pastor tem danga nisung adenshia tekülem sentong magitsü tuyur," ta paisa metetdaksü.

"Tang tesüsa district nung parnok senden amenba sülen Tenla ki ajak shibangang, ta sangdongogo.

Senden tembangba sülen Hindu telok balala nungi lenirtemi motorbike rally ka ayongzüka Khristantem anema yimyim ayima liasü," ta paisa metetdaksü.

Taküm January 9 nü Madhya Pradesh nung anti-conversion ozüng agizükba sülen nungi tenzüka state nung Khristantem anema inyakba kanga bulua kümogo.

Taküm küm mezüngbuba ita trok tsüngda Madhya Pradesh nung Khristantem anema inyakba tatalokba 48 liasü.

Madhya Pradesh Freedom of Religion Ordinance, 2020 ozüng kübok aibenertem küm 10 tashi tepuokdak ayutsüa akok. Iba ozüng kübok nisung

shingaiia tamangba yimsü memeyiptsüla mesüra m e y i p d a k t s ü t s ü memerangtsüla. Temesüzükba mesüra amokmeren agi tamangba yimsü meyipdaksüba mesüra kibong akümtsü atema yimsü meyipdaksütsü merangba mesüra ashikülak ajanga tamangba yimsü meyipdaksütsü makok.

Iba ozüng kübok tamangba yimsü mimshia kibong kümra küm 3 nungi 10 tashi tepuokdak ayutsü aser senchi sen 50,000 tashi achitsü. Scheduled Castes, Scheduled Tribes aser tanurtem tamangba yimsü meyipdaksüra küm 2 nungi küm 10 tashi tepuokdak ayutsü aser senchi 50,000 achitsü.

Item ama tatalokba lira nisungba tsürabur, guardian mesüra adianutemi iba dak sendakba nung ken o benoktsüla. Tamangba yimsü meyipnertemi anogo 60 jelia district administration nem metetdaksütsüla aser tamangba yimsü meyipdaksüba ketdangsi agitsüpurtemia anogo 60 jelia district administration nem metetdaksütsüla.

August ita kija nung Kaduna state nung Khristan 36 tepset

September 01, 2021: August ita kija nung Kaduna State nung Fulani teloki Khristan 36 tepsetogo, ta International Christian Concern (ICC)-i metetdaksü.

"August 4 nungi tenzüka August 28 tashi nung Zangon Kataf, Kaura aser Chikun counties nung Khristantem amak. Doh (Mado) yimdak Khristan 17 tepset, Madamai nung pongu, Buruku aser Udawa na nung ti, Machun nung asem aser Goran Gida nunga Khristan asem tepset," ta kasa osang ajanga metetdaksü.

Zonkwa Arogo nung putir, Rev. Jacob Kwashi-i Khristan

17 atema asüpila sentong agia liasü.

"Iba linük nung tang ama sorkar tamajungtiba onoki mengudang. Nigeria nung azü tokshiba ya sorkari pusemer. Onok Muslim nunger masüba agi onok tepseter," ta pai metetdaksü.

"Sorkar dak metaloker Fulani jihadist teloki Khristantem tepseter, kiojen aser alu raksatsür. Ajisüaka onoki onok sasa kümzüksü merangba mapang sorkari onok ang apur. Iba ya ochi temeden asü?" ta putirisa metetdaksü.

Fulani Muslim nunger ya lisopurtem lir aser parnok timbakati Khristantem den

yimjung nung alir, ajisüaka Fulani kiralongrartemibo Khristantem tepseter, yimtsüngtem amaker aser Khristantem meyong ali rakzüka agir.

ICC Regional Manager for Africa, Nathan Johnson-i, "Khristantem dak taocha makai tepsetba ya anentsüla. Nisung aika tepseter saka tekümzükler mali, iba denji külemi sorkari teyari magütsür, ibaji ajanga aibelenertemi maneni Khristantem anema inyaker. Khristantem amakba nokdangtsü atema Nigeria sorkari inyaksüla aser aibelenertem nem temerenshi agütsütsüla," ta metetdaksü.

ANOGO ABEN TSÜNGREM DEN

Tsüngremer telangzüba mission sapi

Oba, na kechi koda kü dak lir aser ni Ne dak lir, yamaji parnoka asenok dak lidakjang, anungji Nai ni yok ta alimai amangtsü. Yohan 17:21

Samaa aliba lima alangzükba mission nung Tsüngremi aiben meimchir tesendaktepji shilem ka ama jembir (Yn. 13:20; Matt. 25:40). Kuli kaji temeshi metsü, aji chirtem tajung sotettsü aser parnoki Tsüngrem dang tashi angatsü aser parnok Tsüngremer mission nung amshitettsüsa alitsü (Mal. 2:14-15). Kasaji, arogoji Khrista temang lir. Arogo nung Tebu den mission ka nung alitsü makok (1 Kor. 12:12). Asen meketa alir tekümtet asoshi asenok o asenok na tsüngda tesendaktepji kanga tongtipang lir.

Yisu kangki-i matudang Pai nütsüngtem tasü itta alitsü, mesüra tamang katetta alitsü, mesüra Pai kechi sayu aji bilemteta alitsü sarasademer alitsü ta asenoki bilemtsü akok. Aji saka Pai parnok kati ka den meimtepa alitsü sarasadem. Tsüngrem meimtsü saka tangar dang mememshitsübaji tanelaren tamakoktsü ta Yisui angatetta liasü.

Nai Tsüngrem meimba tetentangbaji nai tangar dang meimer asü masü aji shisadangtsüba lir. Asenoki ashir, "Kotak nung aliba Obala, tebilemtsü Na aser ni tsüngda nung masü. Ni kü mulung ajak agi na meimer. Ni tangar dang mememtetter." Aser Tsüngremi ashir, "Ibaji tamakoktsü. Tangar, shirnok asoshi Kü chir asü parnok dang mememra nai Ni meimtsü makok" (Yn. 13:34-35). Na meketa aliba khristantem den lungjema melira nai Khrista dangi tangar anir arutsü makok.

Afghanistan nung Khristan aika tepsettsüa akok: Mike Pompeo

September 01, 2021: lir, aser ibaji Taliban-i agizükba Sharia ozüng kübok nung takok ngua yimsü asü ozüng alema inyakba lir. US-tenzükogo saka iba linük i iba linük toktsür aoba nung Khristantem densema ajanga Khristantem aika minorities bo kanga tepsettsüa akok," ta pai tsübuteper.

Taoba mapang US Alliance Defending Secretary of State, Mike Freedom (ADF) nung Legal Pompeo-i shidi ka ajanga Officer, Giorgio Mazzoli-i, American Center for Law & Justice (ACLJ) dang, iba democracy aser ozüng linük nungji Khristantem jenti malitsü ta aikati bilemer, iba tepsettsüa akok, aser iba denji külemi tang tensa atemaji tamendakdak ajanga tanur aser tetsürtem yanluogo, ta metetdaksü. densema Afghan nunger meyrjang aika linük tesem

Mike Pompeo-i, "Taliban teloki yimsü asü tenzüka balala nung prokshioigo aser sülen tensa mejungi kümogo, reshikangshi tsübuua aikati aser Biden Administration-i linük toktsür jena oner," ta kecha meinyakra Khristan aika tepsettsüa akok," ta metetdaksü.

Pompeo-isa, Taliban ket nung Khristantem tenüng lir nung onoki [UN züngsem] aser parnok bushiba osang states aser linüktem dang aika lir, ta ashi. reshikangshi tia nung aliba

Afghan nunger Khristantem reshikangshi ya aser parnok ket nung travel tang ang tetenzükler lir, ta pai documents shidak meliaka ashi. "Parnok (Khristan) aika parnok linük nungi aniteta Muslim yimsü toktsür kümzüksü asoshi mepishir," Khristan yimsü agizükertem ta Giorgio-isa metetdaksü.

OLONG PAITEP # 5924

1			2		3		4		5	
6		7								
					8					
9				10						
						11				
			12							13
	14								15	
					16					
			17							
									18	
19										

TIPILEN

- 2. Teburtemi tejak nung awaba - (8)
- 6. T _ _ _ em - (3)
- 8. Tzük ayudak - (3)
- 9. Nüngdakba dang timba - (6)
- 11. Züina ao - (4)
- 12. Yangi tzü angur - (5)
- 14. Tangar dang nungi tali - (4)
- 16. Senyong masü - (6)
- 17. Oadokdi - (3)
- 18. Tzü tarok - (3)
- 19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
- 3. Nisung ka mapa inyaksü nübo - (4)
- 4. Azüntsü asoshi mejemba - (6)
- 5. Tesangwa agütsüba - (5)
- 7. Tila masü - (4)
- 10. Tebenjem tetsür chanu - (4)
- 11. Tekolak nung inok - (4)
- 12. Tetsüngda - (6)
- 13. Tangar inyakba ka inyak - (6)
- 14. Tim masü ta ashi - (5)
- 15. Asalendong - (4)
- 16. Tanü dangtsü - (4)

OLONG PAITEP # 5923 TELANGZÜBA

TIPILEN :

- 1. Telok, 4. Aluru, 6. Ozüng, 8. Emk,
- 9. Kin, 10. Teti, 12. Süir, 13. Jen,
- 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kioksü,
- 5. Lenti, 7. Tajangzük, 11. Teronem,
- 12. Sempa, 13. Jahaz.



ALOKBA O WARAKLA NA MANGATETTEP



Par kibong ji Waraklai dang ajepreper aruba agi maremtet Alokba apusor.

- Alokba** : Nia tebur ato ya, nü nem dang mezüng meshia alitsü masüji tanü nungi ni nü indang Husband post nungi Resign asür, anungji yimlipilema release süangma.
- Warakla** : Release bo asütsüsa, saka Substitute Husband ka mangu tashi na continue süa atatsü, ok?
- Alokba** : Ok ma'am!

Lilir : WhatsApp

TANÜBO NAI LANGZÜANG

Q. Koba state nung 17buba Ang asütsü La Ganesan shim ?

- [A] Telangana [B] Manipur
- [C] Assam [D] West Bengal

===== (Taruba adok nung onoki langzüksü)

YASHI ADOK TELANGZÜBA: Uttarakhand

AO OSHI ANGAZÜKDAK:

TANÜ ANGAZÜKTSÜBA OJANG



Kurang

(n) tokolak sembangba (cap)

* Anü apudang **kurang** semer senzütsüla.

Kurem

(v) kanga jashia bilemba (bitter feeling)

* Tanurtemi anepalu masüba agi tsürabur temulung kanga **kurem**.

NAI-A YA METETTER MA?

SEPTEMBER ITA TONGTIBANG ANOGOTEM: (NATIONAL & INTERNATIONAL)

(Yashi adok nungi...)

- * September 16, 2021: Malaysia Day
- * September 16, 2021: World Ozone Day
- * September 17, 2021: World Patient Safety Day
- * September 18, 2021: World Bamboo Day
- * September 18, 2021: International Red Panda Day (Third Saturday)
- * September 19, 2021: International Talk Like a Pirate Day
- * September 21, 2021: International Day of Peace (UN)
- * September 21, 2021: World Alzheimer's Day
- * September 22, 2021: Rose Day (Welfare of Cancer patients)
- * September 22, 2021: World Rhino Day
- * September 23, 2021: International Day of Sign Languages
- * September 24, 2021: World Maritime Day
- * September 25, 2021: World Pharmacists Day
- * September 25, 2021: Antyodaya Diwas
- * September 26, 2021: World Contraception Day
- * September 26, 2021: European Day of Languages
- * September 26, 2021: World Environmental Health Day
- * September 26, 2021: World Rivers Day (Fourth Sunday)
- * September 27, 2021: World Tourism Day
- * September 28, 2021: World Rabies Day
- * September 29, 2021: World Heart Day
- * September 30, 2021: International Translation Day

SUDOKU # 5965

TELANGZUBA # 5964

						1	5	1	4	2	5	6	3	7	9	8
					5	8		7	9		9	3	6	8	7	4
6		9									7	5	8	2	1	9
	6	1	5		3	4	9				5	2	7	1	4	8
			6		2						8	1	4	3	9	6
	2	5		4		1	3				3	6	9	7	5	2
2				6	1			8			4	9	3	6	8	7
				7		9	1				2	8	5	4	3	1
3			8		5	2	6				6	7	1	9	2	5

OJANG LUTEP # 5510

- NGKAA :
- ZÜLZÜPAEMBA :
- NGAAJA :
- TILOK :
- NZÜTEKBA :
- NGNU :
- MAKTAOK :
- ENAIB :
- TSUALUSA :
- ERAKÜM :

OJANG LUTEP TELANGZÜBA # 5509

TUYUBA NUNG MANIDAKI PEI MOLUNGKA INYAKDANG TANGARA TIMTEMI IDAKTSÜTSÜSA AKÜMER

TAN HOPTA ATEMA - KOMA SÜLA ?

Q. Tang Nagaland nung parnoki meshiba ama, Mangkolemba, Tseminyu, Shamatore aser Tobu district tasen 4 akümtsü state government-i agizük nunga koma süla ?



September 01, 2021 nü Kolkata nung nisung kati LPG gas cylinder belenba noksa nung angur. September 1 nü LPG cylinder shia nung sen 25 tuogo.

Linük nung school tem tanaben lapoktsü atema tensa asadang

New Delhi, September 01 (Agencies): India linük tesem ajaklen school tem tanaben lapoktsü atema tensa asadangtsü asoshi Bodhbarnü Union Education Minister, Dharmendra Pradhan-i Education Ministry nung tongti ketdangsertem den senden ka menogo. Yaküm küm tetenzüklen India nunga coronavirus tashidak prok tenzükba sülen March ita nungi tenzükba linük tesem ajaklen school shibanga liasü, saka tangbo state aika nung class sasep nung school aika tanaben lapokogo.

tensa tajungba akümba sülen state aikati school tanaben lapok tenzükogo, ajisiüka tesayurtem aser staff tem aika vaccine anaprong magiba indang tebilemstü iba senden nung lemsatepa liasü.

Senden tembangba sülen Ministry of Education-i twitter ajanga, "Education Minister @dpradhanbjp-i Deptt. of School Education & Literacy nungi tongti ketdangsertem den senden mena linük tesem ajungalen school tem tanaben lapoktsü atema tensa asadangogo. September ita tashi nungbo school tem nung tesayurtem aser staff ajak vaccine agitsü atema asalentong yanglua aliba pai asadangogo," ta metetdaksü.

Tawa Medanta Chairman aser Managing Director, Dr Naresh Trehan-ibo tanurtem nem vaccine magütsü tashi sorkari taruba ita 2-3 school melapokdaksüü atatsüla, ta metetdaksüogo.

China, Pak aser Afghanistan loktepra timtem ajurutsü: Chidambaram

New Delhi, September 01 (Agencies): Bodhbarnü Congress Party lenir tain, P Chidambaram-i, UN Security Council-i Afghanistan atema bangzüng ka renemba atema India-i kanga kerabo pei sasa tenüngsang magitsüla, ta metetdaksü.

atema UNSC bangzüng renemba atema India sorkari pei sasa tenüngsang agir, ta ashi.

Pai twitter ajanga, "Bangzüng nungji tetezü ana lir. Mezüngbubaji, iba onük bentetogo mesüra India temelung asütsüsa bentetogo. Ibaji UNSC nungbo matalok.

Taoba mapang Union Minister, Chidambaram-isa, China, Pakistan aser Taliban-i yimsüsüba Afghanistan linüktem loktepra ibaji ajanga timtem aser shisabulu bener arutsütsü, ta metetdaksü.

Tanabuba tetezüji- asenoki aginübatem kaket nungbo züluogo aser kar nem kaket nungji sign südaktsüogo! Yashi UNSC nung yamaji atalokogo," ta metetdaksü.

Asenok sasa tenüngsang agitsü atema ano tera kerar, kechiyong China, Pakistan aser Taliban-i yimsüsüba Afghanistan loktepra ibaji shisabulutsü onük ka lir, ta pai ashi.

India leniba nung UN Security Council nung, Afghanistan litsüji linük kar amokmerentsü mesüra kiralongrartem jenokdaksütsü atema mamshitsüla, iba denji külemi Afghan nunger aser bendangertem nem timtem kecha magütsüü linük nungi yoktsü atema Taliban-i nangzükba ama inyaksü imlar, ta bangzüng renema liasü.

August ita nung UNSC nung India Tir leniba kübok Afghanistan atema linük 15 aliba Council-i tang mezüng bangzüng renemer.

Osang angazükba agi, UNSC bangzüng ajanga Taliban telok dang Afghanistan nung kiralongrar telok balala

nokdangtsü aser linük toktsür oner Afghan nunger ajak yaria yoktsü mepishi.

UNSC nungsa India Foreign Secretary, Harsh Vardhan Shringla-i LeT aser JeM kiralongrartem shilem metetdakja item telok aitsütsüla, ta metetdakja liasü.

GDP tetezü Gas, Diesel & Petrol nung jenjang atuba lir: Rahul Gandhi

New Delhi, September 01 (Agencies): India nung Gas, Diesel aser Petrol jenjang maneni atuba atema Centre sorkar aija Bodhbarnü Congress lenir, Rahul Gandhi-i, tesüiba küm tenet tsüngda totzü saru nung sorkari sen 23 lakh crore aazükogo, ta metetdaksü.

rongsenketsüng tsütsü temelenshi tasen ka nguogo. Külen demonetisation lir aser külen monetisation lir. Mezüng Modi-i demonetisation benok aser finance minister-i monetisation benoker," ta pai ashi.

"Ato kilonser Narendra Modi'er medemer pezü pongu shi monetise asü aser rongsenketsüng parnok ket nung amoktsür," ta paisa ashi.

Taoba mapang Congress Tir, Rahul-isa, sorkari gas, petrol aser diesel nung jenjang tupet atuba agi tesüiba küm tenet tsüngda sen 23 lakh crore aazükogo, ta ashi.

Petrol, diesel aser LPG gas dak sendakba nung Rahul-i, "2014 küm UPA sorkar anenba

mapang nung LPG cylinder ka nung sen 410 dang liasü saka tangbo cylinder ka nung sen 885 kümogo, aser iba ya shilem 116 atuba lir. 2014 küm Petrol litre ka nung sen 71.5 dang liasü saka tangbo litre ka nung sen 101 kümogo, aser iba ya shilem 42 atuba lir. 2014 küm diesel litre ka nung sen 57 dang liasü saka tanübo litre ka nung sen 88 kümogo," ta metetdaksü.

Bodhbarnüa Centre sorkari Liquefied Petroleum Gas (LPG) cylinder shia nung sen 25 tuogo. Tesüiba ita ana tsüngda gas jenjang asemen atur.

Tang Delhi nung subsidised aser non-subsidised LPG cylinder shia sen 884.50 agi ayoker.

CHIYONGTSÜ TALILA AGÜTSÜBA TAJANGZÜK

Ita trok sülen ner tanur kanga kara inyonga aoer aser iba atema tetsü mamatzü kija agi meperir, anungji tashi aser nutrients tali nüngdaker.

Ner tanur nem tanga nutritious chiyongtsütem agüjang aser kasa mapang nung maneni mama yongdakjang.

Stable chiyongtsü, legumes, shi, ango, süngolemba aser süngjanglijang densema chiyongtsü anük anüka yanglur anogoshia chidakjang.

Issued in public interest by:

State Project Management Unit
POSHAN ABHIYAAN, Nagaland, Kohima

COVID-19 mechi Sri Lanka nung economic emergency sangdong

Colombo, Rongjui/September 01 (Agencies): Sri Lanka nung sen jenjang ajema akumba ajanga chiyongsü nung jenjang timba akumba sülen economic emergency sangdongogo.

Jenjang saka akumba azüoktsü mechi ketdangsürtemi jang aser shini densema chiyongsü ajak azüoktsü, ta ashir.

Taküm US dollar den medemdangra Sri Lankan rupee ya shilem 7.5 agi tajemba akum.

Maparen aika nung kongshiba emergency maparen ya Mongulbarnü nungi tenzüker.

Sorkari taoba mapang army general inyaka alir ka commissioner of essential services ama shimtetogo aser shishilempar aser tayoker temi yua aliba stocks tem rakzüksü tashia agütsü.

"Shimteta aliba ketdangsüri stocks nung yua

aliba tongtipang chiyongsütem alizüka nübür nem jenjang tajemba nung yoktetsü," ta Tir Gotabaya Rajapaksa-i sangdong ka nung ashi.

"Market nung timtem majurutsüsa sorkari item oset ya bendanglen nungi bener aruba osettem nung custom value nung ajemdaker jenjang atettsü," ta sangdong ajanga ashi.

Shini, onion aser alo amala chiyongsü nung jenjang atuba sülen iba osang ya sangdong.

Mamatzü, kerosene aser sorochiokdang amshiba gas densema osettsüset balala agi anünga akumba ajanga dokan tem kima nung nisung jenti adenshia liasü.

Foreign exchange rate nung temlokba ajanga taoba küm nungi tongtipang oset aika nung jenjang atu, ta Department of Census and Statistics ajanga ashi.

It aka nungi ita ka tsüngta

inflation ya August ita shilem 6 akum, aser ibai talisa chiyongsü nung jenjang saka akumba ajanga lir, ta department-i ashi.

Iba linük nungya bendang lima nungi chiyongsü aser dang osettem bener aruba timba lir, kong coronavirus cases aser asüba tali akumba ajanga tourism nung kanga mejungu kongshi, koba linük nung foreign currency aazükba rongnung tongtipa lir.

Taoba küm tourist tem ajema akumba ajanga Sri Lanka indang economy shilem 3.6 agi tamajungba akum.

Foreign currency tem linük alema aoba ajemdaktsütsü meranga taoba küm March ita sorkari bendanglen nungi bener aruba gari tem nokdanga liasü.

COVID-19 cases tali akumba ajanga Sri Lanka ya anogo 16 curfew nung lir, koba Hombarnü tembangtsü.

WHO ajanga Coronavirus tabu tasen ka asadanga mapang lir

Rongjui/September 01, 2021 (Agencies): World Health Organization ajanga coronavirus tabu (variant) tasen ka asadanga mapang lir, ta shiogo. Iba COVID-19 variant dang ya "Mu" ta ajar aser mezüng Colombia nung January ita jangjateta liasü.

Mu indang scientific tenüng ya B.1.621 lir, koba WHO ajanga "variant of interest" ta ashir, ta hopta shia pandemic bulletin adokba Mongulbarnü sangdong nung ashi.

WHO ajanga, Mu variant ya melenshia aor, anungji mozü agi mapa meinyaktsü amai sayur aser tali tajungba nung angatettsü asoshi maneni shisadangtsü nüngdaker, ta ashi.

"Mu variant melenshia aika lir, anungji nisung temang nung tashidak balala den raraba (immune) nungi jenbutsü tashi lir amai sayur," ta bulletin nung shia liasü.

Alima nung COVID-19 tashidak menatepa aoba ya ano maneni timba akumdang virus mutations tasen poktetsü akok ta ajaklen khuret lir. Tang talisa kanga kera menatepa aotsü akokba Delta variant ajanga

mozü magi alirtem dak tali kongshir aser virus anema tenokdanga mera balala agüja aliba salaba region tem nung tali tamajungba kongshir.

SARS-CoV-2 densema COVID-19 adokdaksüba virus ajanga ya mapang süitema aoba den külemi yimya melenshir aser yamaji melenshia aoba agi virus dak mokongshir mesüra tashi maiba mekumdaktsür.

Saka yimya melenshiba ajanga virus ka indang properties nung kongshir aser temelaba nung menashia aor, tashidak agi temang nung timtem tesashiba agütsür, mozü nungi kumzüker.

WHO-i tang tashinung COVID-19 tabu pezü jangjateta lir aser item rongnung Alpha, koba tang linük 193 nung lir, aser Delta, koba linük 170 nung lir. Mu densema variants pongu asadangtsüsa kumogo.

Colombia nung putetba sülen Mu ya danga South America linük aser Europe nunga puteta lir.

Alima nung Mu cases ya shilem 0.1 dang tajemba nung lir saka Colombia nungbo shilem 39 lir, ta WHO ajanga ashir.

Airport shibangba sülen Afghan nungertem tetsübu nung arütsü bushir



US mitkartem ainshiba sülen Kabul, Afghanistan nung aliba Hamid Karzai International Airport telungi Taliban special force züngsemtem aruba noksa ka yangi angur.

Kabul, Rongjui/September 01 (Agencies): Taliban-i agiba sülen nisung meimchir timtem tulu ajurutsü anasai aruba mapang bendanger tenla agütsürtemi telanzüba koma ka agütsütsüar memeteti lia Afghanistan yutsür jena aotsüpur Bodhbarnü arütsü nung adenshi aser bank tem nunga nisung jenti arua liasü.

Hombarnü US sepatem okshia ainshiba sülen Islamist sepatitemi bank, mozüki aser sorkar meyong machinery tem manendaktsütsü temolung agüja inyaker. Küm 20 raraba nung anüolen linüktem yariba Afghan nung aika tayimtsü amshia linük nungi anizüker ogo.

Kabul nung aliba airport ya mamshiteti kumadokba sülen Taliban tsüburtemi Iran, Pakistan aser central Asia

linüktemi jena aotsü meranga arütsü bushia aru.

Khyber Pass anüdoklen Pakistan-i aoba border crossing tongtipang, Torkham nung Pakistan ketdangsür kati ashiba agi, gate lapokba ataa nisung aika Afghanistan tsütsü adenshia lir.

Nisung meyirijang aika Afghanistan aser Iran tsüngta Islam Qala border post nung adenshia liasü, ta tenük kuli alirtemi ashi.

August ita tiyonglen Taliban-i Kabul yimti agiba sülen US-i anir tayimtsü amshia iba yimti nungi nisung 123,000 dak tema anizüker ogo, saka lendongbang nung aliba Afghan nung er meyirijang aika linük yutsür moteti lir.

Afghanistan nung terenlok lokti tentet balala atema inyaker

Afghan nung er staff 10,000 aser 40,000 tsüngta lendong ajurutsü amai bilemra Germany-i anir aotsü, ta Germany kisüngi asadangteta lir.

Hombarnü pangzüng ka renemba nung UN Security Council ajanga Taliban dang Afghanistan yutsür onürtem timti yoktsü melatsü ajungshia liasü, saka parnoki safe zone ka yanglutsü atemabo mashi.

Kabul nung airport anepalutsü atema Taliban-i Qatar aser Turkey den jembishinür, ta French Foreign Minister Jean-Yves Le Drian-i ashi.

United States nung September 11 nü amakba sülen al-Qaeda lenir Osama bin Laden agütsütsü memolungba mechi 2001 küm yimsüsüba nungi atsüngdokba mapang bendanger sepatitem den

yaritepba Afghan nung er ajanga nem tatok agütsütsü, ta Taliban-i sangdong.

Taliban lenirtemi Afghan nung er dang kidangi meyipa shilanga linük tanaben yanglushiba nung yaritsü ayongzük aser meimchir temeden kumzüka ayutsü nanzüka parnok mezüng yimsü asüba dang nungi terabo teladakba amai ajiteter, shirnoki Islamic law kanga sashia benoka amshia aru.

Parnok yagi 1996 küm yimten rakzükba mapanga kasa ya nanzüka liasü, saka taoba tir ka yimjak nung süngzü agi alenseta südaktsü, tetsürtem shisaliok aser mapa nungi nokdang, aben süoshi agiba yimya tesashi amshidaktsü aser Kabul nübürtem asoshi temerenshi balala amer yimzü süa liasü.

Mongulbarnüa Afghan yimtiba nung bank ka kima Taliban züngsemtemi tetsür ka dak süng agi züka merenshia nguogo, ta tetsür kati ashi.

Taliban-i tang tashi sorkar ka tenteta mali mesüra parnoki koma yimsü asütsü tebilemba ali, itemjia memettdaktsü, aser parnoki 1996 nungbo linük yimtiba agir ghonda ishika tsüngta leadership council ka tenteta liasü.

Kidanger linük, Pakistan ya Taliban den tesendaktep tajung lir, aser iba linük indang foreign minister-i, "Anogo ishika tsüngta Afghanistan nung ajaki molunga agizükba sorkar tasen ka alitsü imlar," ta Mongulbarnü shia liasü.

Kabul nung sorkar ka meliaka Britain aser India-i

Taliban nungi teshimtet lenirtem den Doha nung senden balala mena jembishinüogo.

US mitkartem anizüker aoba sülen Afghanistan nungi anünga aliba America nung er aser tembar linüktem indang sensotem anizüker aotsü atema Taliban madak global marketplace densema par tajangzük aliba meratem amshitsü, ta Washington-i ashi.

Washington-i Taliban ya blacklist nung yoka liaka Afghanistan nung teyari balala agütsütsü atema United States-i taoba hopta temelaba ka agüja liasü, ta Treasury Department nungi ketdangsür kati ashi.

ISIS-K ajanga timtem agütsüba United States-i temolung nung züngzünga yua lir, ta Pentagon odongtar John Kirby-i ashi. ISIS-K ya Afghanistan nung amenoka aliba Islamic State den sendaktepa lir aser taoba hopta Kabul airport nung US sepaia 13 densema Afghan nung er aika tepsetba asoshia parnoki tenüng agia lir.

ISIS-K ya anüolen linük aser Taliban asoshi tsükchir lir aser parnok anema tang anüngzüka aliba Afghan army densema telok balalai nokdaker. Hombarnü aonung linük yimtiba north tsütsü Panjshir valley nung Taliban anemba telok den raraba mapang Taliban züngsem tenet asü, ta osang ka ajanga ashi.

United States-i Afghanistan nung aliba ISIS anema mitkar yoka raratsü indang kecha mashi saka Tir Joe Biden-i mitkar tashi amshia linük yangerba maparen temogo, ta Mongulbarnü shia liasü.

Dimapur nung Daily flower market lapokogo



Dimapur, Rongjui/September 1 (TYO): Dimapur District Floricultural Association tawabangba kübok Daily flower market ka Supermarket nung tanü Thangbemo SDO Hq-i, Deputy Commissioner, Dimapur tenü nung lapoktsüogo.

Shishilembadak lapoktsüba mapang Thangbemo-i, "Floriculture ya international

jenjang nunga market tulu ka lir, anungji iba inyakyim ya asenokia benoka inyaksüla aser yimdak yimtsüngtem nunga prokshia yoktsüla," ta ashi.

Sentong nung o tatsüka jembiba mpang Sr. Executive Officer Development Authority Nagaland, Noletto Visa-i, DDFA kübok nung metsürtem aser DAN atema iba shishilembadak

lapokba ya tajangzük tulu asütsü kechiyong nung metsürtem nem shishilembadak kanga dang nungdaka aliba tesem ka agütsüogo, ta ashiba den iba ajanga iba tesem tebor tajungba kümdaktsütsü aser sen aatsü atema DAN nem teyari agütsütsü, ta ashi.

Maneni DDFA tir Zubeni L Imchen-i, mapang talangka nung yongyaa ataba sentong ka asangsang nung atalokogo, ta ashi. Laisa, iba shishilembadak lapokba ajanga jila tebor jungdaktsüba dang masü saka kidanger state nungia nung alitsüpurtem atsüa arua district aser state rongsenketzung tajungba kümdaktsütsü ta ashi.

Peren district nung ASHA tem nem training agütsü

Dimapur, Rongjui/September 1 (TYO): COVID-19 nung Paediatric Care aser Psychological Wellness dak sendakba nung ASHA tem training sentong ka August 20 nungi 27 tashi CMO Office, Peren-i ayongzüka agiogo.

Training nung Covid dak sendakba nung olulu osangtem, lendong temaitsü, paediatric age group nung covid 19 tashidak temaitsü aser tanurtem tekümzükba kübok anema alitsü atema mental health dak sendakba nung tangazükba agüja liasü.

ASHA tem nem parnok shilem aser khuret aser ANM/ASHA temi Surveillance aser Monitoring atema Checklist dak sendakba nung tengazükba agütsü.

Maneni, tetsü aser covid 19 positive tetsü kati asoba tanur anepalutsü aser Integrated Management of Neonatal and Childhood Illness (IMNCI) indang tangzükba parnok nem agüja liasü.

Training sentong nung district kübok ASHA 136 nem tangazükba balala agütsüogo. Training nung shisalen agütsürtem rongnung Dr. Nuksung, CHC Tening, Dr. Vezokholu, Athibung PHC, Dr. Rachel, CHC Jalukie, Dr. Reuben, DH, Kamnanlyu CHO Nsong HWC, Sekholu DCM,

Ipungringle BAC Sardar, Samzai BAC Jalukie, Lhainephal, BAC Athibung, Kewidinbile, BAC Tening nung densema liasü, ta CMO Office Peren, District Media Officer Shekho Sophie-i sangdong ka ajanga metetdaksü.

Office Of The

Ao Students' Union Dimapur

Theme: For The Nation

TENÜNGSANG AGÜTSÜR

Tawa Kyrgyzstan nung tembangba Global Association of Mixed Martial Arts (GAMMA) Asian Championship tournament nung Longsa yimtsüng nungi P Limawati'er jabaso Mr. Longtsukumba aser Mongsenyimti yimtsüng nungi Imtiolem Ozukum'er jabaso Mr. Arsenba Ozukum nati Silver Medal (Welterweight Division) aser Bronze medal (Fly weight Division) nguteta kongnang tetushi bener arutsüba atema Ao Students' Union Dimapur-i tenüngsang agütsür.

Maneni tarutsü nunga anema lia takok nung asayayonga aotsü atema union-i imlaja atar.

Sd/-
Temsukaba Aier
President, ASUD

Sd/-
T. Lanuwapang
General Secretary, ASUD

TEPELA TASOBA ANOGO

Tenüng : TIASEN
Küm : 7
Tasoba anogo : September 2
Class : 1
School : Little Buds School
Talidak : Imkonglenden Colony Dimapur



Asen teyanglur Tsüngremi jala Asenla küm tenet tashi anema arishi motsüba tepela salem lemsateper. Ano maneni arishi talang den alima kaket shisatsü bushiba nung takok tajung anguba jala sädakjang aser Tsüngrem aküm tsübuba jala sädakjang ta sarasadema atar. Amen.

Temeim oja, oba, otsü, obo, kinungertem.

GOVERNMENT OF NAGALAND

POWER DEPARTMENT
NAGALAND: KOHIMA

PWR/NERC-33/17/112

Date Kohima, the 18th August 2021

ADVERTISEMENT

The Department of Power, Government of Nagaland invites applications for the post of Chairman-cum-Member, Nagai and Electricity Regulatory Commission. The qualifications will be as per Section 84(1) of the Electricity Act, 2003 and the term of office and conditions of service of the Chairman-cum-Member will be as per the provisions in Section 89 of the Electricity Act, 2003.

Interested candidates may apply with their detailed bio-data latest by 20th September 2021 by post or email (nagaland.dopn@gmail.com) in the following address :-

Principal Secretary,
Department of Power,
Nagaland Civil Secretariat,
Kohima -797004
Nagaland.

Sd/-
(K.D Vizo), ITS
Principal Secretary to the Government of Nagaland.
Dated Kohima, the 18th August 2021

SÜR KÜM KA AJUNGBA ANOGO BILEMTETER

ASÜR MRS. KEWELE IMTI JAMIR
TASÜBA ANOGO : 02.09.2020



Tanü anogo na iba alima nungi pilar küm ka abensar aser na onok den meliaka nü temeim mapatem bilemtetera temulung raksar, saka kodang onoki na teti tatem makaba anisüngzük lima nung lir ta amanger, iba jagi na onok den teti ali ama onok mulung süngzüksür.

~ Temeim Kinungbo, Jala-jabasotem,
Semchirtem aser Anük-okotem.

MENUNGRA BILEMTETER

"Kibubai agütsü aser Kibubai bener ao,
Kibuba tenüng moajang. Yob 1:21.



Tasü tait aser ochi pukemer züsenket tebuti Wabong J. Lepzüng Lkr (Akhoya) na iba ayanger lima toktsür Kodak Tebu kidangi or tanü agi küm ana abensar.

Ita aser anogotem azüngmeyaka süitemdang na meblemte anogo ka danga süitema meyoker. Ne ochi temeim mapatem onok den teti lir. Onoki na kanga menungrar saka kenü Tebu kidang asenok ajuruteptsü timla nung onok mulung süngzük.

Temeim Kinungtsü, Jala-jabasotem,
Nai meimba Semchirtem aser Kinungertem.



OFFICE OF THE AOYIMKUM VILLAGE COUNCIL

DIMAPUR DIST. : NAGALAND

Regd. No. Cab. 13/17/83. (Vol-11)

Date: Kohima 17th May '88 : P.B.O. 246

Ref. No..AYG/ELCOR/2021-22/02

Date.31.08.2.021

TENÜNGSANG AGÜTSÜR

Aoyimkum Village Dimapur nungi Wb. Limawati Ao aser Wt. Takalemla na jabaso Sp. Longtsukumba Ao (Longsa Village)-i India team tenüng nung Cholpan-Ata, Kyrgyzstan kübok ayongba GAMMA Asian MMA championship 2021 asayamung nung Silver Medal takok anguba atema Aoyimkum Village Council ajanga pa nem tenüngsang agütsür. Nai takok anguba ajanga Nagaland aser linük nem tenüng tajung bener arutsüogo.

Tarutsü nunga nai takok aika angutsü asoshi onoki sarasademtsür.

(Imchamba)
Chairman, AVC.

Chairman
Aoyimkum Village Council
Dimapur Dist., Nagaland.



(Putunungsang Lkr)
Secretary
Aoyimkum Village Council
Dimapur : Nagaland

Office of the

WATSÜ TELEN CHANGTONGYA

P.O. Changtongya, Dist. Mokokchung

TENÜNGSANG AGÜTSÜR

Ozü Changtongyatsür Watsü S. Arenla Lkr, Retd. Principal FAC Mokokchung, D/O Late I. Supong Lkr (Changtongya) 23 Buba Watsü Mungdang lenitsü Tir shimba asoshi la nem tenüngsang agütsür aser Aotsür ajak dang kanga pelaba metetdaksür.

La lenisüba nung asen Watsü Mungdang takok ngua tejakleni anir aotsü asoshi tulusang Tsüngrem dang sarasadema atar.

Sd/-
(WATILA JAMIR)
President

Sd/-
(SATEMLILA)
Secretary

Pakistan aser New Zealand series atema terepranger melatsü: PCB

Lahore, Rongjui/September 1, 2021 (Agencies): New Zealand aser Pakistan tsüingda aruya aliba limited-overs series atema, tereprangertem, shirnok Covid-19 vaccine agir lir, parnok stadium telungi aita asaya reprangtsü asoshi melatsü, ta Pakistan Cricket Board-i ashi.

Iba series asayaba mapang board-i Covid-19 vaccine agir alir shilem 25% shi melatsü telemtetba agiogo. New Zealand team pur September 11, 2021 nü Islamabad tonga arutsü aser Lahore nung T20Is pungo masayadang, Rawalpindi nung team ana tsüingda ODIs asem asayatsü.

"Saisapong dak sendakba asayamung mashi ka nung tereprangerji kanga dang tongtibang, kechiyong parnok adenba ajanga asayartem tali jangrabangra shilem agitsü asoshi ajungmesor aser asaya tali meraktdaktsür," ta PCB chief executive Wasim Khan-i

ashi. "Asaya 8 (ODI aser T20Is) atema PCB dang tereprangertem melaba asoshi onoki NCOC (National Command and Operation Centre) dang pelaba lemsateper," ta Wasim-i ashi.

Iba telemtetba dak sendakba nung, September 17, 19 aser 21, 2021 nü Pindi Cricket Stadium nung terepranger 4,500 agi stadium nung ODI series asemprongla reprangtetsü.

2003 küm tesüsa telok anaprongla asayar külen nungi New Zealand puri Pakistan nung mezüing asayatsü terenemba lir.

Pakistan nung Covid-19 wara adoker külen nungi nisung million 1.16 dak iba tashidak putet aser nisung 25,600 dak tema süogo, ta government data ajanga metetdaktsü.

National Command and Operations Centre nungi temelaba agir sülen, Pakistan


aser New Zealand tsüingda 50-overs format atema Pindi Cricket Stadium nung terepranger 4,500 aser T20 atema Gaddafi Stadium nung terepranger 5,500 shi aruagi reprangtetsü.

Pakistan nung Covid-19 tensa asadangshitsü atema National Command and Operations Centre (NCOC) ya military ajanga achayangba tetet ka lir.

2009 küm Lahore nung kiralongrartemi Sri Lanka team bus amakba sülen bendanglen nungi cricket team temi iba linük nung cricket asayatsü asoshi arendaka liasü. Iba lendong nung police 6 aser civilian 2 taküm sama. Küm aika lir sülen, 2019 nung Pakistan kübok International cricket asaya tenzükshia liasü.

2019 küm nungi Pakistan nung South Africa, Sri Lanka, Bangladesh aser Zimbabwe Cricket team asayaogo.

Antoine Griezmann Atletico Madrid-i meyipaogo



Antoine Griezmann

Rongjui/September 1, 2021 (Agencies): France nunger forward asayar Antoine Griezmann Barcelona nungi küm ana asayaba sülen Atletico Madrid-i tanaben meyipogo, ta club anapronglai Bodhbarnü metetdaktsü. Arishi küm 30 tain asayar yagi Atletico nungi asayaba mapang goal 133 idaktsür lir, aser pa tanaben küm ka atema loan nung club nung denogo aser pa den tenanzüktepba ya küm ka atsülangtsü akok, ta Atletico-i ashi.

Barcelona pur rongsenketzüng nung timtem adoka lir aser ibayongji Ballon d'Or trokben tashi koker aliba asayar Lionel Messi-a taoba ita Paris Saint-Germain-i yokogo.

2019 küm euro million 120 yong alizükba sülen Griezmann ya club nung sen timtiba aazükba asayartem tem rongnung ka liasü.

Barcelona-i, pa club toktsür aoba osang jangjatsüogo aser ashiba agi Atletico-i asayar taa agütsütsü. Tenanzüktepba kübok pa indang loan mapang tembangba sülen teti atema tenanzüktepba yanglutsü densema lir, ta Barca-isa ashi.

Club anapronglai pa

alizüktsüba taa mesangdong saka osang ajanga ashiba agi pa euro million 40 yong ayoktsü latetogo.

Griezmann tang Luis Suarez den longjemogo, shiba ita 12 tejakdang Barca nungi Atletico nung oa aden.

Ronald Koeman-i aniba Barcelona team puri Griezmann melena Sevilla striker Luuk de Jong alizüktsü renema lir ta osang ajanga metetdaktsüogo.

De Jong-i Spain nung season ana nung goal 10 dang idaktsür lir.

Griezmann Atletico nungi asayaba mapang 2018 Europa League dang koka liasü. Pa 2014 küm Real Sociedad nungi Atletico nung oa aden.

Pa Barca nungi asayaba mapang Copa del Rey kokogo aser Athletic Bilbao den final asayaba mapang pai mezüingbuba goal idakja liasü.

Ajisüaka Griezmann-i Barca nung junga masayatet aser pai league asaya 74 nung goal 22 dang idaktsü.

Griezmann-i club toktsür aotsü imlaa maliasü aser season tasenba nung asaya asemprongla nung pa tetenzük nungi asayaogo.

ICC Test Rankings: Joe Root temaba jenjangi tuogo



Rongjui/September 1, 2021 (Agencies): Tawa sayaba ICC Men's Test Player Rankings nung batsmen tem rongnung England captain Joe Root temaba jenjangi tuogo. Tang India den asayaa aliba ICC World Test Championship series nung pai kanga junga asayaba sülen küm trok shi lir tang mezüingbuba pai temaba jenjang tongtetogo.

Iba asayamung tenzükba mapang arishi küm 30 tain asayar ya jenjang pongububa nung liasü

saka Test asem nung pai run 507 yangluba sülen pai Virat Kohli, Marnus Labuschagne, Steve Smith aser New Zealand captain Kane Williamson nunger jatetogo. Pa Williamson dang nungi rating point 15 agi timba lir. Leeds Test masaya tsüingda Root tanabuba jenjang nung liasü, kong pai England nunger innings ka dang asayaba nung run 121 yanglua liasü.

Root tesüsa 2015 küm December ita temaba jenjang nung liasü aser iba sülen

Williamson, Kohli aser Smith nunger dang melentepa temaba jenjang nung lia aruogo. Parnok pezü dak alaka temaba jenjang tongteba asayar ji South Africa nunger asayar AB de Villiers dang lir. Pai 2015 küm November ita temaba jenjang tongteta liasü.

Kasa mapang nung Rohit Sharma-i captain Virat Kohli ajateta India nunger rongnung batsmen tem rongnung temaba jenjang nung lir. Sharma shiba 2019 küm October ita jenjang 54buba nung liasü, pai tang mezüingbuba pa indang career nung top five tongtetogo. Pai innings ana nung run 19 aser 59 yangluba sülen jenjang pongububai tuogo aser Kohli dang nungi rating points tenet agi timba lir.

Kohli dak alia India nunger rongnung Cheteshwar Pujara-i dang 2017 küm November ita temaba jenjang tongteta lir.

US Open: Zverev, Bencic & Barty tanabuba round-i iogo

Rongjui/September 1, 2021 (Agencies): Germany nunger asayar Alexander Zverev, shiba mezüingbuba Grand Salm ka akoktsü asoshi meranga asayardar pai US Open tebur kija asaya mezüingbuba round nung America nunger asayar Sam Querrey kokogo.

Mongolbarnü mezüingbuba round asaya nung pai 6-4 7-5 6-2 agi Querrey madak takok ngua tanabuba round tongtetogo.

Querrey-i mezüingbuba set anabo kanga toktepa asaya saka unforced errors kanga menaba ajanga pa asaya raksa, aser kasa mapang nung Zverev-i aibelen mesüi asaya aser winners 25 nguteta liasü.

Zverev tanabuba round nung

Spain nunger asayar Albert Ramos-Vinolas mesera France nunger asayar Lucas Pouille den asayatsü.

Kasa asayamung tetsür kija asaya nung Tokyo Olympics nung gold medal ngur alila Belinda Bencic-i Dutch tsür Arantxa Rus 6-4 6-4 agi koka tanabuba round-i iogo.

Bencic-i 2019 küm U.S. Open semi-finals tonga asayaogo saka taoba küm coronavirus wara poktetba ajanga iba asayamung nung shilem magitsü telemtetba agia liasü. Lai service kanga junga oteta asaya aser tang agi asembenbuba atonga Rus masak takok ngutetogo.

Arishi küm 24 tain asayar ya tanabuba round nung Italy tsür

Martina Trevisan den asayatsü.

Maneni tetsürtem rongnungisa World number one Ash Barty-a mezüingbuba round nung Vera Zvonareva madak takok ngua tanabuba round tongtetogo. Lai iba asaya 6-1 7-6(7) agi koka liasü.

Mezüingbuba set nung Barty-i kanga junga asaya tenzük aser 3-0 agi tejakdang akümba sülen minute 24 tsüingda asaya kokatok.

Ajisüaka tanabuba set nungbo arishi küm 36 tain asayar Zvonareva-i kanga junga asaya aser tiebreak asayatsüsa aküm koba 9-7 agi Barty-i akok.

Barty-i, Wimbledon aser Cincinnati Open akokba densema taküm asayamung pongu koker lir.



Caracas nung Venezuela den World Cup qualifying asayatsü lia practice session nung adentsü atema Argentina nunger asayar Lionel Messi par teammate tem den hotel toktsür aoba mapang fan tem ajurutepba noksa nung angur.

BILEMDANGANG

"Asüing atema renemshitsü mapang tajungtibaji tanü lir."